

小  
腆  
紀  
傳

小腆紀傳補遺卷第

男承禮謹撰

列傳

曾

英

李占春  
于大海

楊

展

袁韜  
武大定

王 祥

皮

熊

張默

曾英字彥侯莆田人從父宦成都因家焉爲人倜儻有材武  
喜赴人緩急士多歸之號曰曾公子甲申春張獻忠自楚將  
入蜀英請於巡撫陳士奇獨將千人當賊不許而以全蜀兵  
使羌漢總兵趙光遠率之與賊戰大敗走漢中英復痛哭請  
兵士奇不得已署英守備以土兵數百試之英盡散家貲市  
牛酒教練旬日士皆踴躍願效死會賊至瞿塘峽口氣驕弗

備英設伏擊殺賊阻險不得入與英對壘日夜挑戰英堅壁  
不出而多張疑兵於山谷每夜擊賊賊驚擾自相斬殺爭走  
山上觸飛礮死者無算凡守四閱月救援不至退屯忠州夏  
四月賊至忠州英率水師迎戰火其舟百餘賊死千計及英  
還守涪州賊遂悉眾屯忠州葫蘆壩陳士奇之在重慶也命  
其將趙榮貴扼梁山陸道加英參將與守道劉麟長守涪以  
扼江六月賊至榮貴望風遁英戰而敗退至五里望江關賊  
追及砍傷其頰英年殺數人跳而免與麟長走川南賊遂陷  
涪州趨重慶長驅入成都所過喋血以人肉爲糧當是時蜀  
人皆思英曰曾公子而在吾不至此獻忠大索英有僧高其  
義匿之以千金資英召募旬日得萬餘人裹創出戰敗賊於

魚腹浦明年三月督師王應熊與巡撫馬乾傳檄討賊而苦  
兵少聞邑紳刁化神以鬼道募兵甚眾使英襲取之遂擊走  
賊將劉廷舉復重慶於是王祥起遵義楊展起犍爲曹勛起  
黎州蜀紳前總督樊一蘅前戶部郎中范文光舉人劉道貞  
或奉詔或承制出師前侍郎余思恂與前四川學道王芝瑞  
奉應熊檄權宜措置兵食袁韜武大定各以兵反正夔州譚  
宏譚詣巫山劉體純鄧城胡名道金城姚玉林施州王光興  
王有進呼九思各起兵討賊所謂夔門十三家也賊所據者  
僅成都保甯順慶數郡而已初劉廷舉之棄重慶走也求救  
於獻忠獻忠顧劉文秀曰楊展不足畏重慶要害地不可失  
也命文秀水陸並進英與劉麟長自遵義赴援使部將于大

海李占春張天相逆之於多功城而自以精兵問道襲破賊營取其旗幟還與大海等併力夾擊文秀大敗脫走者不能十一其別將攻嘉定者亦大挫劔王祥復移兵綦江與英犄角兵威大振祥才武亞於英而英之復重慶也樵採不禁王應熊怒之故委任不及祥至是英禦賊屢有功丙戌春應熊乃奏以英爲總兵王祥爲參將連兵進討賊益懼遂棄成都走川北英駐軍江上商民避賊者依英以自固因之成市永曆帝立封平蜀侯是年十二月我

大清肅親王豪格誅獻忠於鳳凰山其黨孫可望等突至佛圖關英部將李定余仲等逆戰可望等皆窮寇死鬪李定等失利而余仲卽入營縱火眾大亂英中矢以顛於河而歿時

年二十六英戰輒先登所向辟易而赭美髯賊望見驚以爲神眾至二十萬威名爲遠近所憚嘗欲屯田於重慶而應熊不許識者惜之我

朝賜通諡曰節愍

李占春涇陽人于大海項城人皆曾英心腹將以勇聞英之成功二人之力也占春封定川侯大海封靖南侯丙戌冬英死於佛圖關占春與大海率殘卒奔涪州明年降賊袁韜爲王師所敗由順慶南下占春等避之東走夔州將赴荊州歸命適朱容藩自肇慶入蜀取道施州衛溯江西上遇占春大海說之復回秋七月

王師泊忠州之湖灘占春以輕舟直薄我營

大兵亂棄舟走川北占春乘勝至涪州結營平西壩大海屯忠州之花凌河爲脅齒旣而武岡之變傳言永厯帝已就執容藩遂自稱監國二人不知其僞皆聽命焉九月川北總督李乾德以袁韜武大定兵復重慶容藩令占春襲之不克於是諸鎮口治兵相攻矣戊子八月督師呂大器至涪州占春入謁大器具言容藩僭逆狀占春始悟請討叛以自贖乃帥舟師攻之容藩因敗死庚寅秋劉文秀入蜀破遵義明年冬十月遣別將廬名臣入涪州占春逆戰於羣豬寺口而敗大海在忠州聞之知不支遂放舟出夔門入楚降於

王師未幾占春亦降

楊展嘉定人崇禎辛未武進士初爲曾英部曲以功授參將

充川鎮中軍官獻賊之入蜀也展與曹勛同守成都被縛斷  
索躍入江涸水至嘉定而賊已改嘉定爲府乃潛入犍爲殺  
僞令以起事襲嘉定州人開門納之勛亦起兵黎州與展聲  
勢相應和丙戌三月賊帥劉文秀秋三品來攻爲展所敗展  
遂合遊擊馬應試盡復嘉邛眉雅諸州邑獻忠聞展兵勢甚  
益大懼率兵十數萬裝金寶數千艘順流東下將走楚展逆  
於彭山之江口縱火大戰焚其舟賊大敗士卒輜重喪亾殆  
盡走還成都展取所沈金寶以益軍儲士氣益張七月獻忠  
走川北展聞其遁引兵追至漢州賊已遠颺乃盡收暴骨叢  
葬焉時蜀地殘破

大清兵旣誅獻忠不能留諸舊將稍稍出收復保聚嘉定近



省而險展復善於撫綏遺民及潰賊相率歸之而連歲沔饑  
斗米二十金蕎麥七八金父子兄弟轉相殺賊流莩載道展  
乃遣使赴黔楚告糴前後得米數十萬石自鄉先生以及弟  
子員具贍資送其家農民給牛種口食使擇田而耕壯而願  
從戎者補月伍與銀米使操兵戰百工雜流各以其藝就食  
孤貧無告者廩之蜀民賴以全活者甚眾愛展如父母走四  
方者述展慈愛莫不流涕展以是富強甲諸將焉戊子春永  
歷帝以巡按御史錢邦芑言封展華陽伯得錫予有加己復  
擢授總兵官都督同知進宣平侯己丑陳邦傳之假敕封孫  
可望爲秦王也可望飛檄召展以兵屬己展得檄上言臣茹  
荼闢草爲陛下收蜀固黔方日望朝廷指授方畧進收川北

乃可望忽以檄至舉陛下所有土地甲兵盡授之可望臣誓  
不與賊俱生久矣無難焚檄殺使出兵東川烏蒙與可望爭  
一旦之命願以可望抄膽救稿若果出上命者然是以不敢  
鹵莽爲先發後聞之事將無可望之僞乎抑豈皇上果舉六  
御以授賊乎如皇上果有此勅則臣等從此皆可望之臣而  
非皇上之臣在廷孰爲此謀者若命不出自朝廷而爲可望  
所僞傳則臣願首戎行與諸勳鎮執大義以討亂賊上但優  
詔令展固守封疆而已曾袁韜武大定與李占春構隙久駐  
重慶士卒饑總督李乾德遣人說展與合兵因其餉展大喜  
誓爲兄弟徙韜屯犍爲大定屯青神而所求願不甚遂展與  
占春故交好頻通問以銀萬兩米萬石餽之韜與大定愈不

悅乾德亦怨展之遇已簡畧也秋八月詭稱介壽置宴卽席  
上取展首襲嘉定展子璟新以三百騎突圍走其妻陳氏指  
韜與大定罵曰爾窮來依我我先人處以縣邑資以多財何  
負於爾而圖之眞喪心犬彘也遂被殺展智勇冠諸將川東  
西之起兵者倚爲長城旣死人心解體占春率兵爲展報仇  
不勝而歸曹助與展爲刎頸交亦默然而阻川陝總督樊一  
蘅投書責乾德曰嘉陵峨眉間二三遺民不與獻忠之難者  
楊將軍力也背施忘好而取人杯酒之間天下其謂我何乾  
德笑以爲救時大計詎豎儒所知然蜀紳士無不切齒乾德  
者孫可望之再入蜀也亦訟展冤自是蜀事大壞矣

袁鵬沔縣人崇禎中川賊有姚天動黃龍聚黨劫掠巡撫陳

士奇令營將趙榮貴擊破之擒其渠魁馬超一斗麻代天王等二十餘人姚黃走脫他徙而韜因姦婦事發投響馬賊馬潮呼九思等繼姚黃而起獻賊之入蜀也乘勢據蓬州儀隴南部久之分爲十二大隊歲饑以人爲食

王師破之於遂甯潮九思走死韜以餘眾歸樊一衡授副將使守順慶丁亥故巡撫李乾德奉命總督川北諸將中惟許韜與武大定大定者固原人亦小紅狼之別部降於孫傳庭以材武見稱國變後與孫守法聚眾南山中閩中封爲伯王師至戰敗走興安守法死大定入蜀與韜合眾數萬謀突秦而西

王師擊之大敗乃收餘眾棄順慶東奔至是乾德欲與就功

結二人爲心腹會李占春等有湖灘之捷韜亦反鬪入佛圖關取重慶奉乾德駐之已復與占春構隙治兵相攻而重慶兵多食少乾德乃遣人說嘉定守將楊展與合兵久之竟構展於乾德殺之而并其眾韜之欲圖展也其妻流涕諫曰我軍流離飢凍非楊公眾且散矣負人大功鬼神且有冥誅必不可勿聽及展死韜妻亦自縊辛卯冬孫可望據黔將窺蜀乃聲二人罪遣其將王自奇將一軍由川南進別遣劉文秀率精甲萬人由滇渡金沙江出黎州取曹叻以襲其後韜與大定不知也方悉力拒於川南而文秀逕趨嘉定韜等撤兵還戰六戰六勝有輕敵心俄而文秀以大兵壓其前自奇泝流擊其尾大敗就擒遂降嘉定陷乾德沈水死

王祥綦江人或曰大學士王應熊之僕也崇禎末爲九圍子監官勇悍著聞張獻忠亂蜀惟遵義一府未下祥守之賊不敢窺宏光帝立詔應熊督師卽遵義開藩乙酉春副將曾英復重慶屢破賊兵祥亦出師綦江相犄角祥威望不及英而應熊委任過之奏授參將累至副總兵官明年獻忠死其黨孫可望等潰兵陷重慶殺曾英破綦江由遵義入黔祥走永甯山中丁亥應熊卒於畢節衛呂大器代爲督師可望入雲南祥於永甯赤水間招集散亡聚至萬人是年八月進攻遵義復之據有其地收定瀘敘以西遵義古播州地饒沃而深阻祥於其間撫流亡治屯田且耕且守蜀士大夫避亂者多歸之戶口充實祥以是雄於諸鎮時朱容藩在重慶僭稱監

國怒袁韜不爲禮使李占春襲之而敗乃私鑄錦江侯印送祥求其以兵應占春祥以兵出綦江與韜三戰不勝退駐南岸忌占春之盛而欲爲好於袁也許請占春議事伏兵執之使部將王朝興守之朝興與占春同里守稍懈占春踰垣出殺追者一日夜歸其壩上營祥既失占春而又爲韜所持軍無糧殺馬而食於明年四月回遵義既而巡按御史錢邦芭上諸將功狀詔封祥綦江伯是年遵義饑祥遣人赴黔告羅貴陽鎮皮熊攻而奪其資祥怒舉兵攻熊不勝而還熊因奏祥不奉天子詔越地相侵約諸鎮會討諸鎮久羨遵義殷富各率兵攻祥大小十餘戰不能克祥使人聯和皆罷去惟黔兵深入相持月餘兵老乏食熊子文英年少不習軍事氣益

襄乃引軍走祥悉銳乘之熊兵大潰爭渡烏江死者三萬餘人祥亦上疏自理上使使和解之會盟烏江罷兵修好於是思南銅仁湄潭各郡邑皆歸於祥太常寺少卿程源及鄉官梁應奇辜延泰等先後赴肇慶行在皆言祥雄武可大用明年乃進封忠國公加右都督掛征討將軍印祥既受公封頗感激思自效累遣使自平越慶遠貢獻金馬中道輒爲陳邦傳所劫奪孫可望之求冊封也祥亦疏言不可庚寅秋可望將圖蜀遣劉文秀取遵義至永甯守將侯天錫迎降詐以危言報祥曰滇兵二十萬已渡烏江來矣不如先期避之祥懼召諸將與謀將軍李定者驍勇敢戰眾服之定曰二三年來操戈同室雖捷亦恥今發兵討賊復有何疑勝則國之福不



勝不失爲忠義鬼他何所云祥遂招烏合六七萬分爲三十  
六鎮與文秀戰於烏江大潰私計自眞安州入彭水據險守  
隘引李于爲助猶足自立乃裹其文繡金寶使牙將負之先  
行定頗足嘆曰百戰基業一敗而逃何足計大事乎眾心盡  
解多送款文秀文秀疾發兵掩擊祥倉卒夜走牙將已劫其  
資而去比曉失妻子從者僅百餘騎追兵至祥馬蹶不能行  
率死士數十人短兵接戰創重自刎死文秀降其眾盡收遵  
義地初獻賊入蜀畏祥不敢窺遵義前後拒守凡八年我  
朝賜通諡曰節愍

皮熊字玉山臨江人父爲銅仁賈遂家焉幼育於羅氏冒姓  
名羅聯芳旣顯乃復本姓熊行伍起家厯官鎮筭副將土酋

安邦彥反以功擢總兵官鎮沅江加左都督兼太子太師熊通文墨知名義能以節制馭軍不爲民擾土漢安之丁亥正月孫可望由遵義趨黔熊不能禦敗於烏江走平越及可望入滇棄貴州不守熊以軍入之報稱恢復又破土賊藍二等以功封定番伯鎮貴州時永歷帝在武岡熊惡劉承胤之橫欲迎駕未果旣

大清兵入武岡黔中不知乘輿所在熊與鑛謀之都御史楊鼎和御史馮洗議奉韓王監國會上出懷遠間道遣詔諭熊事遂寢然已藉藉傳聞廷臣以是爲熊罪熊固弗知援覃恩求封詰中書舍人吳其靄當直草制有丸泥封谷夜郎自大語熊乃疏辨乞改正上雖從之而心勿善也每敘錄將士勞

勤求陞賞多格不行以是視諸鎮權藉尤輕熊亦以身爲守  
土帥無恢勦任遂擁兵晏居不與楚粵爭戰事黔之東北陲  
與楚塞犬牙者馬進忠張先壁郝永忠王進才往來屯合平  
都勻間則有張登貴莫宗文其西接蜀瀘則楊展王祥各擁  
部眾屯聚熊藉居中以安而地逼糧少亦莫能自振惟聯絡  
土司保固境內而已明年遵義饑祥來黔告糴熊謂其詞已  
虛實遣部卒奪其資祥因舉兵圍貴陽三日敗而遁熊亦結  
各鎮攻祥不克朝廷遣使詔諭乃解己丑可望據滇求王封  
熊與祥各疏行在言今之入滇者爲獻賊餘孽名雖向正事  
豈格心朝廷毋爲所愚上乃封熊匡國公亦進祥公封欲藉  
以防滇寇也然二人時相構讐亦不能有所効力焉明年秋

可望以不得王封而怒大出兵趨貴州熊度不能支遣官李邦華通好請盟可望不許熊益懼避之清浪衛可望遂據有全黔熊復徵土司兵三萬出平越爲馮雙禮所敗遁入烏羅司可望遣白文選追執之奪其兵旣而釋之熊遂入新添山隱焉復之水西依女夫趙默默宣慰司安坤師也丁酉

王師入黔坤迎降熊祝髮於水西之可渡卜河旣永厯帝被執熊聞報絕粒七日不死有常金印者自稱開平王後與坤謀反正熊亦使蜀人陳進才給放劄付招集部曲爲我總兵沈應時所獲事洩甲辰春吳三桂大發兵攻水西坤等敗死熊走避烏撒冬十月三桂遣騎執至雲南時年八十餘背立不順命諸降將往省之熊稱引古今忠義追敘國家敗亡之

故詞意慷慨積十三日不食始瘖越日乃絕戮其屍義士王中立盜而葬焉

張默字允明太原人匡國公皮熊堦也父琳官定番學正流寇至琳及妻子死焉默在熊家得免難潛行入楚蜀結壯士圖恢復及熊入隱新添山默亦攜家入水西宣慰司安坤聞默至師奉之居數年吳三桂破水西坤敗死默被執歎曰我弱而至此卒不得乾淨土死命也三桂餌以官不答臨刑索紙筆自爲墓銘而死

會稽梁繼元參校

小腆紀傳補遺卷第

男承禮謹譔

列傳

儒林

刁包

高世泰顧樞嚴

張夏

沈國模施璜汪

王朝式

謝文淳管宗聖邵

盛敬

朱用純

李生光

汪佑

劉原淥

胡承諾

張岱

毛乾乾

刁包字蒙古晚號用六居士祁州人天啓丁卯舉人敦尙質行力以斯文爲己任於城隅闢地爲齋曰潛室亭曰肥遯日閉戶讀書其中崇禎季年流賊犯州城包毀家倡眾誓固守城得不破時有二瑞主兵事探卒報賊勢張甚二瑞怒其惑眾將斬之包厲聲曰必殺彼請先殺包乃止二瑞相謂曰使若居官其不爲楊左乎賊旣去載送流民全活甚眾旣聞京師陷設烈皇帝主服斬袞朝夕哭臨賊迫授僞職包以死拒幾及於難會賊敗得解我

朝定鼎遂不仕日取宋元諸儒書反覆尋究其學以謹言行爲要以程朱爲宗初從孫奇逢聞良知之學旣讀高攀龍書喜曰不讀此幾虛過一生設攀龍主事之偶有過舉必展謁

梅謝其勇於自克如此嘗曰爲蓋世豪傑易爲慊心聖賢難  
又謂易之爲書教人趨吉避凶言趨正避邪也以爲趨福避  
禍舛已甚矣父歿三日勺水不入口鬚髮盡白杖而後起年  
六十七以居母憂哀毀致疾將卒問家事不答徐曰吾胷中  
無一事行矣遂瞑學者私謚文孝先生所著有易酌四書翊  
註斯文正統辨道錄潛室劄記用六集諸書

高世泰字彙旃無錫人都御史攀龍從子也少侍攀龍講席  
篤守家學晚年以東林先緒爲己任葺道南祠麗澤堂於梁  
溪與從子愈等講習其中祁州刁包往返論學尤莫逆有南  
梁北祁之目歛人汪學聖者所學近禪旣至梁溪乃大悟前  
失其同里施璜汪璉吳慎汪知默陳二典胡岸汪佑朱宏輩



方講朱子之學於紫陽書院因學聖以問業東林志相得乃  
作紫陽通志錄世泰國變後卒所著五朝三楚文獻錄甚該  
究

顧樞字所止無錫人光祿少卿憲成孫也天啓中舉人少從  
高攀龍講性命之學遂於易暎作易藁折衷至當嘗曰吾祖  
於易最精獨無著述小子可妄穿鑿乎其論儒則服膺薛胡  
而謂陳王不免差失又謂祖憲成主無欲師攀龍主格物並  
直接宋儒時人服其議論醱正國變後韜形遁跡不入城市  
不赴講會以老病終

嚴穀字佩之無錫諸生篤學好古潛心於易春秋嘗課其弟  
穀曰讀書以明道也吾自得高子遺書所學乃有歸宿既與

同志講道東林高世泰推爲主席重修道南祠輯忠憲年譜  
高子節要東林書院志諸書國變後屏跡不出學使慕其名  
貽以額曰力挾正學終不一報謁也著有生軒易說易同春  
秋論春秋集說尙書講義四書講義生軒存稿

施璜字虹玉休甯人少應郡試見鄉先生講學紫陽瞿然曰  
學者當如是矣遂棄舉業發憤自力於躬行每會講先一日  
齋宿務設誠以感人已而遊梁谿事高世泰將歸與世泰期  
某年月日當赴講及期世泰設榻以待或曰千里之期能必  
信乎世泰曰施生篤行君子也如不信者吾不復交天下士  
矣言未既璜已孺子擔囊至矣著思誠錄小學近思錄發明  
行於世

汪璉字文儀休甯人年十六卽手錄先儒書昕夕省覽旣長篤於躬行言動必秉成法所著書甚具一以洛閩爲宗其讀易質疑尤見推於時卒年七十四

張夏字秋紹無錫人初受業於馬世奇之門已而入東林書院其爲學先經後史博覽強記而歸本自治高世泰旣歿學者推夏主講席我巡撫湯斌嘗延至蘇州學宮講孝經小學退而著孝經講義小學淪注及洛閩源流錄隱居菰川之上年八十餘卒

沈國模字求如餘姚諸生嘗入劉宗周證人社歸闢姚江書院以明道爲己任與史孝咸管宗聖輩申明良知之學其學或以爲近禪而言行敦潔較然不欺其志故推醱儒山陰祁

彪佳與國模善彪佳以御史出按江東一日杖殺巨憝數人  
會國模至欣然以告國模字彪佳曰世培亦曾聞曾子云哀  
矜弗喜乎彪佳後嘗語人吾每慮囚必念求如恐倉卒喜怒  
過當也南都亡聞宗周絕粒死哭之慟而講學益勤丙申卒  
年八十二

施博字約庵嘉興人研精理學以知明處當爲獨愼切要功  
夫與餘姚黃宗義善有往復論學書嘗曰劉蕺山吾師乎然  
未嘗執贊其門也乙酉後寓東塔寺終身儒冠博袖晚乃講  
學放鶴洲引接後進有舉成宏名臣諸奏疏請正者博卽下  
拜曰朴老衰愚無志當世君能爲世道留意追蹤前賢甚善  
幸厚自愛蓋其故國之思耿耿不忘也

史孝咸字子虛餘姚人繼沈國模主姚江書院嘗曰空談易對境難於居處恭執事敬與人忠三語精察而力行之其庶幾乎家貧日食一粥泊如也已亥卒年七十八

管宗聖字霞標餘姚人爲人孝友忠亮彊氣自克言動必準於禮鄉人化之孫鑛始興宗聖爲文字交旣從講聖學喟然曰向嗜讀左國秦漢百家先生爲我洗盡矣鑛世所稱月峰先生也

邵曾可字子唯餘姚人姚江書院之立也人頗迂笑之曾可厲色曰不如是便虛度此生遂往學同儕請業多辨難曾可獨默然竟日初以主敬爲學後專提致知師事史孝咸甚謹晨走十餘里叩牀下問疾不食而返月餘亦病卒年五十一

王朝式字金如山陰人沈國模弟子也嘗入證人社劉宗周主誠意朝式守致知日學不從良知入必有誠非所誠之蔽宗周稱其志願大而骨力堅所成就未可量崇禎末浙中大饑朝式倡賑粟全活甚眾時天下大亂將走四方求奇傑士謀治安戰守策不果行國變後旋卒年三十八

謝文洊字約齋南豐人少補諸生見天下方亂慨然有出世志入廣昌之香山闢精廬誦佛經既讀龍溪王氏書服之復讀王陽明書遂與同里邵睿明李萼林講陽明之學年四十矣一日詣新城神童峰會講有王聖瑞者力攻陽明文洊詰難累日心忽動歸取羅欽順困知記讀之始一意程朱闕程山學舍於城西名其堂曰尊洛著學庸切己錄及講義數十

篇發明張子主敬之旨時甯都易堂九子星子髻山七子俱以文章節槩名天下而文游獨反己闇修務求自得其程山十則亦以躬行實踐爲主髻山宋之盛過訪程山遂約易堂魏禧彭任會講旬餘於是諸子皆推宗程山謂其篤躬行識道本同里甘京初與爲友已而服之誠也遂師事之康熙辛酉病自爲墓志卒年六十七所著又有初學先言大臣法則左傳濟變錄詩文集諸書

宋之盛字未有星子人少孤事兩兄如父崇禎己卯舉於鄉國變後結廬髻山足不入城市以講學爲己任其學以明道爲宗識仁爲要於二氏微言奧旨皆能抉摘異同非若世之闢異論者舍精而攻其柄也與謝文游交最篤晚讀胡居仁

居業錄持敬之功益密戊申五月卒同邑有查小蘇者亦棄諸生山居不出年九十而終

章慥字仲實南城諸生國變後隱居華子岡灌園養母入程山學舍與謝文洊論學有針芥之投文洊每心折焉好讀史衡論精審發前人所未發著二十一史童觀集閩史偶談若干卷魏禧稱其發微闡幽大有功於後學

盛敬字宗傳太倉州人年十五遇同里陸世儀卽甚相得與同學者三年厭薄聲華不事舉子業後罹家阨流離播徙去稍遠至崇禎丙子始與世儀及陳瑚江士韶有講學之舉時絕學初興慮驚世駭俗深用韜祕四人者風雨聯牀或橫經論難或卽事窮理反覆以求一是甚有商榷未定徹夜忘寢



質明而後斷或未斷而復辨者既而同志漸多旬月皆有常會會必講貫終日凡身心性命之奧天文地利河渠兵法之學太極陰陽鬼神之祕儒釋之辨經史百家之頤罔弗根究本末要於中正講論之樂嘗恨古人不及見之退則倣先儒讀書記之法各有所錄旬日不著錄卽互相糾以爲學問進退之別世儀所著思辨錄皆十二年間俛讀仰思有所見則疾書以自識其所得者也顧其所紀皆隨筆無倫次敬與士韶乃纂輯精要分類書之士韶字藥園亦太倉州人

朱用純字致一崑山諸生殉節貢生集璜子也以父死國難慕王衷攀柏之義自號柏廬隱居味道不求仕進其學確守程朱知行并進而一以主敬爲程其教學者必先授以小學

近思錄繼進之以四子書每歲孟春率諸弟子行釋奠先師  
禮畢講四子書進止肅恭誠意激發興起者眾已又忠學者  
空言無實得復作輟講語反躬自責言尤痛切論學未嘗持  
異同曰知所當知行所當行可矣與長洲徐枋善屢以書問  
學辨析甚至平居動止有常晨起謁家廟退卽莊誦孝經數  
手書其文敎學者置義田修墓祭友愛諸弟白首無間遇事  
變嶄然不撓自言看得天理熟當機立應如離絃之矢更不  
疑議更不矜張行所無事康熙戊午或欲以鴻博薦固辭乃  
免其後有司欲舉爲鄉飲賓亦弗應戊辰卒年七十二將卒  
顧門弟子曰學問在性命事業在忠孝勉之哉有大學中庸  
講義及愧訥集其治家格言尤膾炙人口云

月生光字闇章絳州人未冠爲諸生聞同里辛全倡學河汾遂往受業質疑問難無虛日生平篤於躬行事親至孝甲申之變生光北向慟哭焚其青衿自號汾曲逸民構草堂讀書其中諸弟子列侍談經課藝外訓以二南大義程朱微言所成就者眾著有儒教辨正崇正黜邪編凡萬餘言衛道之力甚勇又著正氣猶存西山閣筆友于集諸書皆直寫胸臆以淺近語寓覺世牖民之意其處子吟曰東鄰有處子夙明烈女篇字人尙未嫁而乃失所天痛茲生命薄守貞期自全毀容絕膏沐矢志窮益堅愛人貴以德姑姊莫相憐侃辭謝媒妁何用日譏譏是可以見生光之志矣

汪佑字啓我號星溪休甯人少讀四子書謂幸生朱子之鄉

願私淑以終身篤好小學近思錄遵朱子半日靜坐半日讀書法崇禎末寇事棘著平寇十六策思效伊川詣闕上書故事以時不可爲不果上遂隱居事親學日進友人楊景陶邀赴還古書院會講佑見所講多雜陸王之說乃與同人發明程朱正學嘗曰有善無惡性之體有善有惡情之動知善知惡爲良知爲善去惡爲良能擴而充之盡其才窮理盡性至於命斯爲大中至正斯爲至誠无妄乃陽明宗旨反以無善無惡爲心之體何邪顧端文有言釋氏三藏十三部五千四百八十卷一言以蔽之曰無善無惡其害可勝言哉紫陽書院正吾黨講學明道之壇坫也遂集諸子振興紫陽大會歲以朱子生日行釋菜禮講學三日一遵白鹿洞遺規嚴斥岐

趨循正軌蓋佑自遜世後視富貴如浮雲避勢利如蛇蝎格  
格不諧於俗者四十年而一時同人皆知崇尚正學則爲功  
多矣所著有詩傳闡要易傳闡要禮記問答禮記訂訛大樂  
嘉成四書闡要四書講錄五子近思錄四子近思翼明儒崇  
正錄明儒通考明儒性理彙編諸書而尤邃者明儒通考一  
書擇精而語詳高世泰千里借鈔以謂得見此書雖瞑目而  
無憾云

劉原淥字崑石安邱人生五歲問身所從來父奇之十四歲  
而孤事母至孝遇難負母逃卒免禍崇禎末盜賊蠭起原淥  
與仲兄率鄉人壘而守閉婦女一室中約戰敗則火之及賊  
薄壘鄉人多死仲兄身中九矢鬪益力原淥從之發數十矢

矢盡仲兄麾之去原諒大呼曰離兄一步非死所也卒斬首  
二賊遁一鄉得全亂定盡力耕作推膏腴與仲兄分其餘爲  
長兄立後贈其亡姊家大購經史閉關讀書初閱養生家言  
喜之旣讀宋儒語錄乃篤信朱子之學反覆研究者四十餘  
年嘗曰學者居敬窮理二者皆法文王而已矣小心翼翼昭  
事上帝居敬之功也不識不知順天之則窮理之功也又曰  
讀書乃身上之用而人以爲紙上之用居官乃辛苦之時而  
人以爲快樂之時衰年正勤學之日而人以爲養安之日科  
第本消退之根而人以爲長進之根皆可嘆也每五更起謁  
祠堂退居一室與諸弟子講論常至夜分建朱子祠於東郊  
春秋祀焉以喪祭禮廢俗日偷乃酌古今之宜定爲品式祭

必嚴齋戒泣事極虔仲兄疾顛天所以身代兄卒七日中止  
三食久之一邑皆化於禮又爲鄉人置義倉煮粥以食饑人  
嘗言人與我一天而已何畛域之有焉康熙庚辰卒年八十  
二撰讀書日記六卷近思續錄四卷冷語三卷其冷語中詆  
劉安世爲僉壬等於章惇邢恕則以其與伊川不協也儒者  
以爲未讀宋史盡言集云

胡承諾字君信天門人崇禎末舉人國變後隱居天門巾柘  
間窮年誦讀書無所不窺而深自韜晦足不出庭戶生平無  
講學名而析理至精論事尤極平實著釋志六十一篇釋志  
者釋己所志也凡聖賢帝王名臣賢士與凡民之志業莫不  
兼綜條貫原本道德切近人情酌古宜今爲有體有用之學

凡二十餘萬言自擬其書於徐幹中論顏之推家訓然其精粹奧衍非二書所及李念慈序稱尙有續書說若干卷與是書相表裏又稱有菊佳軒詩宏深博奧不屑爲新穎秀發以趨時尙今皆不傳

張岱字宗子山陰人長於史學丙戌後屏居臥龍山之仙室短簷頽壁終日兀坐輯有明一代紀傳爲石匱藏書我學使谷應泰聞其名禮聘之不往以五百金購其書岱慨然曰是固當公之谷君知文獻者得其人矣是時明季稗史多體裁未備惟岱書暨海甯談遷所著國權具有本末應泰并採之以成紀事岱於君臣朋友之間天性篤至其著書也徵實詳覈不以作者自居衣冠揖讓猶見前輩風範年八十八卒



毛乾乾字心易南康人於學無所不窺尤精推數通中西之學崇禎時爲諸生鼎革後縣令捕人應科試乾乾被逼入試文體奇古學使不能句讀題其卷末曰生乎今之世反古之道乾乾見而笑曰羽陵書生但知錢在紙裏中耳歸隱匡廬山不復出著古衣冠講學山中村農負販聽者圍立皆稱爲毛先生也中州謝廷逸往訪之以所著推步全儀爲贄乾乾見而驚曰辨析幾微窮極杪忽古人無此儀器也與之論方圓分體方圓合義方圓衍數俱不謀合歎曰野人肥遯山中日講經術以世人罕知厯數不談久矣今見子豈可謂世無人邪以女妻之偕居陽羨宣城梅文鼎造門求見與文鼎論周徑之理方圓相容相變諸率先後天八卦位次不合者文

鼎以師事之乾乾嘗曰文鼎廷逸老人之畏友也乾乾審五  
音之輕重六律之短長著律學若干卷又雜著二卷子著於  
算數甚有精思能傳其學

會稽梁繼元參校

小腆紀傳補遺

終

小腆紀傳補遺卷第



男承禮謹撰

列傳

文苑

魏

禧

弟禮

曾燦

彭士望

彭任

李騰蛟

邱維屏

王猷定

陳允衡

徐世溥

陳宏緒  
歐陽斌元

張

蓋

申涵光  
劉逢源

殷岳  
趙湛

萬泰

子斯選  
斯同

斯大

柴紹炳

毛先舒

諸匡鼎

顧景星

杜

濬

弟芥

董說

夏古丹

周

質

李麟友

魏禧字冰叔甯都人父兆鳳崇禎中薦舉徵辟皆不就禧負

異稟年十一爲諸生與兄際瑞弟禮并能文章而禧尤知名世稱三魏甲申之變父走山中髡髮爲頭陀自置惡棺誠諸子曰死以殮我禧號慟日哭臨縣庭憤咤不欲生謀從給事中曾應遴倡義兵不果乃棄巾服隱居教授禧負才略善擘畫理勢方流賊之熾也眾謂寇遠猝難及禧獨憂甚移家翠微峰距甯都四十里四面削起百餘丈中徑坂自山根至頂若斧劈然緣坂鑿磴道梯而登因置閘爲守望士友稍稍依之而南昌彭士望朱議霧樂平王綱輩亦皆挈妻子來家翠微閒居講學世所稱易堂諸子也其後數年甯都被寇翠微峰獨完禧旣遞世益肆力古文辭尤好左氏傳及蘇洵文其爲文主識議凌厲雄傑遇忠孝節烈事則益感慨摹寫淋

滿年四十乃出游涉江踰淮至吳越思益交天下奇士於吳門交徐枋金俊明西陵交汪渢乍浦交李天植常州交惲日初楊瑀方外交藥地槁木皆遺民也當是時南豐謝文淳講學程山星子宋之盛講學髻山弟子著錄者皆數十百人與易堂相應和論者謂西江自歐陽鄒魏宗陽明講性學陳亥依復社工帖括其聲力氣骸皆足動一時易堂起獨以古文實學爲歸風氣一振由禧爲之領袖云僧無可嘗至山中歎曰易堂真氣天下無兩矣無可故大學士方以智也康熙戊午

詔舉博學鴻儒禧被徵以疾辭有司督催就道不得已昇至南昌固稱病篤巡撫疑其詐以板扉舁至門禧絮被蒙頭臥

巡撫歎息而去又二年赴揚州故人約卒於儀徵年五十七婦謝氏絕食十三日以身殉無子以弟禮子世侃爲後有左傳經世文集日錄諸書兄際瑞字善伯初名祥亦諸生負經濟大略戊午楚亂我大帥聘往賊營說降爲所殺

禮字和公禧季弟也少從禧授書咎罵皆樂受曰叔兄愛我也年十七補諸生更刻苦自勵學日進國變後禧棄巾服禮請於父願從叔兄後父母卒乃益事遠游厯閩粵渡海達瓊崖北抵燕京返夷門過洛陽南浮漢沔入秦關涉伊水經鳳滁道中足跡幾徧天下所至必交其賢豪尋訪巖穴遺佚之士嘗省故人於韓城往觀砥柱三門聞高士彭荆山居華山絕巘直上四十里手鐵絙躡飛蹬訪之高韓昌黎痛哭處十

里既乃倦游返山中時吳三桂反雲南贛中亂方起諸大吏致重幣延之參幕府竟不出居翠微峰頂榜曰吾廬更以自號年六十六卒有詩古文集

彭士望字躬庵南昌人性慷慨尙氣節崇禎十三年父哲病且革閱邸鈔見漳浦黃道周平臺召對語拊枕歎曰鐵漢也顧謂兒當師之士望治喪畢卽裹糧往謁時道周已下詔獄士望周旋緹騎間會太學生涂仲吉上疏訟道周冤并下獄詞連士望被逮久之始解楊廷麟之殉難也以孤屬甯都彭鋌及甯都破鋌自縊死孤爲兵所掠士望解衣贖之歸時寇盜卒起乃避地翠微與魏氏三子定交講學易堂尤以躬行爲本名其文曰恥躬堂集卒年七十四

李騰蛟字力負甯都人四歲父攜至書室中指案上卦圖以問父爲言畫數卦名覆之對不失以爲偶然他日三四覆之乃大驚長補諸生與臨川陳際泰羅萬藻甯化李世熊同里邱維屏爲文會國變後隱於翠微峰與諸子講學易堂騰蛟年長諸子兄事之後徒居三蠟峰授徒自給衣冠三十年不易年六十卒學者私謚曰貞惠先生著有周易贖言

邱維屏字邦士甯都人三魏姊婿也性高簡讀書多元悟弱冠爲諸生學使侯峒曾奇賞其文

植

國變避亂翠微峰魏禧嘗

從學古文已又同講學於易堂維屏之學原本六經左國史漢旁及諸子百家顧獨有得於泰西之書心悟神解僧無可來易堂常與布算退語人曰此神人也大學士馮溥欲邀一



見卒不往家貧甚居室卑隘牀竈雞彘雜陳衣破敝不能易  
人有迎至精舍居之衣以裘綴直著不辭禧嘗歎曰邦士和  
而介今之柳下惠也其不恭亦似之己未病噎不食卒年六  
十六著有易勦說先是淮安閻再彭以帛侑書求維屏爲其  
妻銘墓未作也卒之日命家人取帛出曰以付叔子還淮安  
閻氏

曾燦字青藜一字止山甯都人給事中應遴仲子與兄晚并  
工詞章喜然諾時天下多故思以功業自見折節下士士翕  
然歸之乙酉楊廷麟起兵贛州應遴以閩嶠山澤間有眾十  
萬俾往撫之既行而應遴病卒贛亦破乃解散去尋祝髮爲  
僧遨遊閩浙兩廣間已歸甯都以大母命受室築六松草堂

躬耕不出後乃入易堂少有詩名選海內名家詩二十卷號過日集僑居吳下最久著止山集西崦草堂詩客游燕市以卒

彭任字遜仕甯都諸生少與同邑溫應搏友應搏死難時兵燹蒼黃人莫敢畫行任獨往購其屍哭而殮之鼎革後結廬巖山名所居曰一草亭足不履城市後與同志講學易堂嘗一訪謝文海甘京於南豐之程山未嘗再他適也著禮記類編及草亭文集嘗論朱陸異同謂學者之病不在於辨之不明而在於行之不篤其持論最平卒年八十四

王猷定字于一南昌人父時熙官太僕卿天啓中名在東林猷定以選拔貢成均工詩古文爲人倜儻自豪少時馳騁聲

伎狗馬陸博神仙迂怪之事無所不為故產爲之傾亂後流寓浙中西湖僧舍其爲文多鬱勃如殷雷未奮又如崩崖壓樹朽槎盤礴旁枝得隙突然干霄也徐世溥陳宏緒歐陽斌元輩皆名著一時有四照堂集

陳允衡字伯璣建昌人御史本子也家東湖避亂流寓蕪江杜門食貧以詩歌自娛後徙舊京晚復歸東湖葺蘇雲卿蔬圃故址居之著有詩譚詩慰國雅筭書

徐世溥字巨源新建人父良彥官工部侍郎世溥年十六補諸生好學能詩文自明季公安竟陵之說盛行文體日瑣碎世溥與同里陳宏緒歐陽斌元輩均能獨開風氣東鄉艾南英江左錢謙益姚希孟里中萬時華皆以杓斗歸之南贛巡

撫潘曾紘得祥符王維儉所修宋史屬世溥及晉江曾異撰  
重加更定世溥才雄氣盛一往自遂屢試不第鼎革後遷居  
山中絕意進取我大學士溧陽陳名夏欲修徵辟故事巡按  
御史親式其閭又作手書遣推官持禮幣往山中致之拒不  
納推官去盜踵至曰金幣安在世溥辭無有盜怒衆之死所  
著曰榆溪集

陳宏緒字士業新建人兵部尚書道亨子也性警敏家藏書  
萬卷晝夜講肄遂知名以任子薦知晉州時眞定屬邑多被  
兵大學士劉宇亮出督師欲移兵入晉州宏緒拒不納遂被  
劾提騎逮問士民哭闕下頌其保城功得釋謫湖州府經歷  
晉長興孝豐二縣事有惠政尋免歸鼎革後屢薦不起輯宋

遺民錄以見志著有石莊集恆山存藁寒衣集周易備考詩經尚書義等書

歐陽斌元字憲萬新建人幼奇慧讀書日十行下終身不忘爲諸生受知於學使蔡懋德侯峒曾皆禮以國士姜曰廣楊廷麟尤相推重稱爲奇才博學與樂平王綱南昌彭士望講求經濟以學業相砥鏃宏光時嘗爲侍郎呂大器草疏劾馬士英二十四大罪又嘗佐督師史可法幕可法薦擢推官士英知呂疏出斌元手銜之擯弗用尋歸隱乙丑辛年四十四有文集十二卷

張蓋字覆輿一字命士永年人性孤介工詩及草書與同里申涵光殷岳友稱畿南三才子崇禎時以序嘗貢太學不就

授徒養母甲申之變棄諸生悲吟侘傺遂成狂疾嘗游齊晉  
楚豫間歸閉土室中雖妻子不得見惟涵光岳二人至則延  
入談甚洽每引酒獨酌或痛哭長嘯人莫測也其爲詩哀憤  
過情恆自毀其稿或作狂草累百過至不可辨識乃已久之  
狂益甚竟死年六十涵光輯其遺稿僅得百篇秀水朱彝尊  
稱其五言詩尤高簡力詣古人云

申涵光字和孟號鳬盟永年人太僕卿佳胤子也博學能文  
尤工詩名聞河朔間以父死國難遂絕意仕進晚年名益高  
與張葢殷岳有才子之目以理學訓其兩弟皆能成立嘗曰  
靜坐白無妄爲讀書卽是立德有故人自京師寄書通問涵  
光報以一詩而已其簡傲如此著有聰山集荆園小語諸書

殷岳字宗山雞澤舉人少跡弛與弟淵并負才名岳嘗官睢甯知縣布袍阜帽騎驢至官舍申涵光遺書勸之歸慨然曰我豈以一官易我友遂投劾歸父太白金陝西副使以忤楊嗣昌坐法死獄中岳上書爲父乞骸骨比歸而京師陷遂入西山與弟淵謀舉義事洩淵被害岳匿涵光家得免遂偕隱西山茅屋三楹與涵光晨夕唱和相樂後客死福州年六十八岳能詩自魏晉以下屏不觀尤不喜律詩所作惟古體莽莽然肖其爲人有留耕堂集一卷

劉逢源字津津曲周貢生通星數河洛之學手鈔二十一史甚精無譌脫與申涵光相唱和以遭亂崎嶇轉徙於江漢淮海之間故詩多幽憂語有積書巖集反漫興棄同時有趙湛

者字秋水邯鄲人亦工詩與逢源齊名王士禎所云逸民也  
萬泰字履安其先定遠人始祖斌以從龍功世襲甯波衛指  
揮遂爲鄞縣人曾祖表官都督同知以儒將私淑新建之學  
世所稱鹿園先生也泰少志文學舉崇禎丙子鄉試復社中  
推爲名宿時東南人士方以社會相標榜泰獨內剛潔外和  
易諸士咸樂就之魯王監國授戶部主事辭不受職而任甯  
波勸分之餉以經義師江上師潰泰變道士服隱居不出以  
經史分授諸子皆愛業於黃宗羲稱高座弟子友人高斗樞  
黃宗炎嘗以事繫獄皆以奇計出之人莫測也初江上師起  
諸生華夏等欲殺降紳謝三賓泰與三賓爲婚力救之免及  
戊子翻城之役諸人反爲三賓所殺泰力不能止眾頗以是



告之泰亦悔甚因自號悔庵晚游粵東有同年生毛汧染疫將死同行者欲棄之泰獨收載親其藥餌汧得生而泰以病舟至彭澤疾革從者同家事不答時丁酉十月也年六十泰詩多故國之思有云廣柳車中容季布湘江澤畔問巫陽至是竟客死人以爲詩識云有寒松齋稿子八人斯選斯大斯同最知名

斯選字公擇泰第五子沈潛理學躬行實踐同里李鄴嗣嘗云粹然有待造次儒者吾不知公擇年六十卒黃宗羲哭之慟曰甬上從游能振黻山之絕學者惟斯選一人耳

斯大字充宗泰第六子少有志操遭亂不事舉業尙書張煌言死難棄骨荒郊斯大與張文嘉葬之南屏山麓春秋野祭

效西臺之哭父友陸符甫中所稱陸萬是也死無後爲制服  
葬之嘗游杭州之玉龍山見張縉彥神主碎之觀者辟易斯  
大學旣淹通用思尤銳精於春秋三禮排纂說禮之言持論  
精核多發明前人所未發李鄴嗣有曰說經無雙名擅八龍  
昔有慈明今見充宗其推服者至矣卒年五十一有學禮質  
疑周官辨非儀禮商禮記偶箋諸書

斯同字季野泰第八子少跖弛不羈父閉之空室中窺架上  
有明史料數十冊讀之數日而畢其兄斯年察知之請於父  
使受業於黃宗羲與聞戢山劉氏之學遂博涉史籍尤熟於  
勝國掌故康熙戊午舉博學鴻詞力辭免明年開局修明史  
大學士徐元文延至京師請授以七品俸稱纂修官辭不受

乃主元文家諸纂修以稿至主者皆送斯同覆審明史稿五  
白卷斯同手定也故督師楊嗣昌之嫺人方居津要乞史館  
於督師少寬假斯同厯數其罪以告之有運餉官以棄運走  
道死其孫以賂乞入死事列斯同曰將陳壽我乎斥之其狷  
介如此卒以布衣終老論者謂斯同以遺民自居而卽任故  
國之史事以報故國其心事類元遺山其潔身非遺山所及  
云所著補厯代史表諸書約十餘種

柴紹炳字虎臣仁和諸生父應權以明經爲興化學博卒官  
紹炳迎柩歸葬躬自負土成墳時節祭奠涕淚迸涌松草爲  
之萎絕旣除喪而猶哭友問禮有卒哭謂何答曰謂不設行  
哭禮耳哀至則哭豈能忍哉里中有避父咎出亡者紹炳遇

之曰爾有父咎非苦我無父咎乃苦耳爲賦游子遇孤兒行  
其人垂泣卒爲孝子夜有偷兒入室覺其爲鄰人也默不言  
攫及衣被徐曰汝獨不能留此爲吾禦寒地邪偷兒驚絕乃  
慰諭之且勸其改行其人泣而去素爲海甯吳麟徵山陰劉  
宗周蕭山倪元璐漳浦黃道周所器及諸人先後殉難依宋  
子俊遇郭有道故事服心喪期年遂隱居南屏山授徒賣藥  
自給有餽餉輒磨去康熙己酉

詔舉山林隱逸之士巡撫范承謨欲以紹炳應薦固辭又請  
刊行所著書亦卻之承謨歎息而止紹炳於象緯律厯輿地  
禮制農田水利兵戎賦役莫不研究治古文精力於九經諸  
史以及漢魏六朝諸家文不及唐以後也與陸圻吳百朋丁

澎張綱孫陳廷會孫治毛先舒沈謙結社賦詩稱西冷十子而紹炳文名最著又治音韻之學著有古韻通六卷嘗以崑山顧炎武書多可疵謫遺書糾正炎武無以難也年五十五卒有經史通考考古類編通考纂略切韻復古編白石軒雜稿省軒文鈔諸書

毛先舒字稚黃仁和人父歿棄諸生不求聞達年十八著白榆堂詩陳子龍見而咨賞因師之又嘗從劉宗周講性命之學其詩音節瀏亮有七子餘風家貧甚嘗欲賣田刻所著書意未決友人諸匡鼎曰產去則免役紙貴可操贏有兩得無兩失也先舒然之卒年六十九有聲韻叢說韻學通指韻白匡林撰書聖學眞語小匡文鈔螺蜂說錄東苑文鈔蕊雲晚

小風集傳補遺 卷一  
唱諸集諸匡鼎者字虎男錢塘人與兄九鼎并有文名時人  
比之機雲軾轍也

顧景星字黃公蘄州人生之夕父夢星降於庭形如半月因  
以名焉六歲能詩八九歲徧讀經史目數行下時稱神童旋  
補諸生先是總督熊文燦挈降賊過蘄諸賊中獻賊最黠荆  
王止飲令走馬後宮與寵姬觀之爲戲景星年十六聞之曰  
熊公不得死所矣明年獻賊果焚穀城叛屠蘄黃展轉避亂  
之崑山居焉南都立授推官馬士英使人密招卻之去游黃  
山白嶽歸過錢塘因浮家澱湖爲長隱計順治庚子  
詔徵天下山林隱佚之士大吏強之不起康熙戊午又以博  
學鴻儒徵有司敦迫就道辭不赴試以老病乞歸杜門息影

翛然遺世顏其堂曰白茅取易无咎之義也踰九年卒年六十七景星記誦淹博才氣尤縱橫不羈詩文雄贍稱霸才有讀史集論九卷暉池錄一百十八卷南渡集來耕集共七十  
三卷

杜濬字于皇號茶村黃岡人副榜貢生啓禎之間楚人言詩者多效法鍾譚濬獨以少陵爲師以此名聞天下亂後僑寓金陵屢甚南昌王猷定嘗問窮愁何似答曰往日之窮以不舉火爲奇近日之窮以舉火爲奇猷定笑曰君言抑何雋也周亮工偶集諸名士觀燈船於秦淮出百金置席上爲采賭鼓吹詞濬遽起攫之云鮑叔知我貧也就吟席振筆直書立成長韻一百七十四句一座爲之傾倒求詩者踵至多謝絕

錢謙益嘗造訪至閉門不與通惟故舊或守土吏徒步到門則偶接焉及功令有排門之役有司注籍優免濬曰是吾所服也躬雜廝與夜巡綽眾莫能止晚年貧益甚竟扼窮以死年七十七卒於揚州生平論詩最嚴於時人多所詆訶有富者重價購其集焚之鄉人某搜得遺藁刊以行世卽變雅堂集蓋不及十之三云

弟芥字蒼略亦諸生與兄濬避亂同居金陵兄弟行略同而趣各異濬廉隅孤特自遂遇名貴人必以氣折之於眾人未嘗接言語用此叢忌嫉然名在天下詩每出遠近爭傳誦之芥則退然自同於眾人所著詩歌古文雖子弟弗示也方壯喪偶遂不復娶所居室漏且穿木榻敝帷數十年未嘗易每



日中不得食兒女啼號客至無酒漿意色間無幾微不自適者後潛七年卒年亦七十七有些山集

董說字雨若號俟庵烏程人尙書份曾孫也負異才年十七爲諸生撰夕惕篇以自勵嘗受三易之學於黃道周國變後祝髮爲僧名南潛字寶雲從南嶽和尙退翁者受佛戒盡焚其少作辛卯退翁以海上事連染幾及禍徒眾星散說獨負書杖策相從不去以是尤爲時所重說經學極博癖嗜文字老益篤相與賞析者若江夏黃周星吳中徐枋金俊明顧苓吳江顧有孝徐崧烏程韓曾駒嘉興巢鳴盛桐鄉張履祥皆遺民也其後居堯峰以終所著書有易發八卷河圖挂版詩律表各一卷周禮緯律呂考歲差攷分野發六書發甲申野

語補船長語夢史殘雪錄埽葉錄西荒詩拂烟集豐草庵寶  
雲諸集凡三十餘種合題曰補樵書補樵亦說自號也詩清  
淡荒遠草書尤奇逸其首陽詠曰草笠古鬚眉首陽一樵子  
擔柴入都城閒話青峰裏云有兩男兒飢死西山趾白髮齊  
太公淚滴青蘋水還顧召公言采薇人已矣讀者可以知其  
寄託焉又夏古丹不詳何處人或云越人胡姓析姓爲名往  
來吳興礪山卒葬龍興橋畔有葫蘆藏藥

周貧初名筠字青士別字貧谷嘉興人少孤事母以孝聞遭  
亂棄舉子業受廩賣米嘗購故家遺書一船筐筥斗斛權衡  
與卷軸錯陳之呶唔自若也一日遊嘉善借宿柯氏園有郡  
丞行署與園鄰貧吟誦達旦丞不能寐恚甚遣吏勾攝將扶

之有士夫解而免其爲詩超儔拔俗不襲前人一語時同里  
王糊范路李麟友海甯朱一是皆相與唱和性好施與人有  
匱乏傾囊給之歲涖率私錢散米以食餓者生計遂漸窘乃  
浪游不復問家人產嘗游徑山日昏暮踏雪走二十里就僧  
舍僧曰山多虎居士遠來得不動心否曰吾行不失道一動  
心則飽虎口矣客京師二年未嘗投貴人一刺尙書徐乾學  
好延攬海內士諸生徐善主其家篋嘗就善同臥起乾學欲  
見之終不可得其歸也給事中某削三緘贈行曰挾此可得  
百金笑卻之歸舟抵宿遷卒年六十五著采山堂集二十四卷  
詞緯三十卷今詞綜十卷析津日記三卷投壺譜一卷

李麟友字振公嘉興人揚州訓導自明次子也揚州破自明

自縊學宮麟友求父骨不得痛哭返遂棄舉子業以布衣終  
其詩恣肆激昂不落凡近著有醒齋吟草

會稽梁繼元參校

小腆紀傳補遺卷第

終

小腆紀傳補遺卷第



男承禮謹譔

列傳

孝友

趙希乾

顏伯璟

耿耀

兄光  
耿思補

光子於彝

劉德瀆

劉思廣

周繼聖

張維德  
張振祚

黃向堅

顧廷琦

劉龍光

錢美恭

趙萬全  
王原

沈萬育

盧必陞

嚴書開

孫博雅

李明性

楊嘉禎

趙希乾字仲易南豐人父師高早卒希乾年十七母病日夜  
禱神祈身代不愈往問吉凶於日者復言不吉希乾踟躕不  
去曰何以救吾母日者惡其煩數曰危矣剖心其可救乎希  
乾心識日者言歸見母病益危篤作疏告神書遺言付仲父  
及弟時日光斜射牀席寂無一人希乾取小刀坐牀上剖胸  
深寸許以手入取其心不可得忽風聲震颯衝其戶希乾驚  
疑以爲有人至急反刀剗其胸肉置几上復取腸出斷數寸  
蓋人驚則心上忡腸盤旋滿胸腹云希乾置腸肉釜上悶絕  
於牀弟妹出見釜上物以謂希乾割股也烹而進之母再視  
希乾血淋胸腹間氣垂絕始知其剖心城邑喧傳聞於令令

親往視之命醫調治不數日母病愈希乾亦漸進食飲惟胸  
前腸出不得納每日子午間腸端漉漉下月餘胸內合終  
身矢從胸上出而穀道遂閉飲食男女如常人學使侯峒曾  
聞其事拔充博士弟子員補壬午恩貢甲申後奉母避亂山  
中貧甚賣卜以爲養又十餘年母壽八十餘乃卒未十年希  
乾亦卒年六十一

顏伯璟字士瑩曲阜人復聖六十六世孫也性孝友補四氏  
學生員父允紹官河間知府值

大兵至城孤乏援力不支朝服北向拜闔室自焚死伯璟與  
弟伯玠時家兗州兵亦至城將陷兵民皆竄伯璟體肥不能  
走伯玠手掖之以行步益窘伯璟曰同死無益弟急去猶可

活也伯玠不肯釋伯璟給弟他顧躍下城伯玠俯視痛哭矢  
及其身而卒伯璟仆地傷左足夜乃甦爲邏卒所得昇以告  
帥不爲屈帥驚異問之則顏子後也遂延之坐留帳前有被  
掠者偶語曰昨見城中婦女十數輩邏卒驅以走中一婦不  
肯行卒反刃擊其臂臂折猶罵不已卒殺之牆下有媼過之  
指曰此顏氏婦也伯璟曰得非吾婦朱氏乎告其帥跡之果  
然蓋刃傷已四日矣驗其息猶未絕載之還復活既聞河間  
已陷長號力請於帥護之出軍壘蹣跚走河間時盜賊充斥  
積日不能得食既乃卒達河間哭其父甚哀方其父之自焚  
也幼子伯珣甫六歲僕呂有年抱之出火負而走道中流矢  
死伯珣匿民間顧得免伯璟既拾父遺骸復訪得其弟與俱



還倪元瑞其父座主也至是道經河間爲文以祭曰父忠子孝是吾師矣由是伯璟之名聞一時生平坦易而家法嚴以肅友愛季弟訓子孫以經義鼓琴賦詩自娛國變後卒恆自言壽止六十一果驗

耿燿太康人邑諸生少時從兄光受業事之如父凡出入起居必諮稟而後行崇禎壬午闖賊陷太康燿率弟炳肩輿昇母避河朔買市以供甘旨母病燿朝出經營暮歸侍疾衣不解帶者累月母沒扶櫬渡河將殯於祖塋會鎮帥高傑兵作亂道梗塞燿出入兵刃間挽車以葬不怵也時定興耿權與弟極以孝友稱炳嘗慕其爲人訂爲兄弟分宅以居且贈田四頃其義譜有云性地成宗心源爲譜容城孫奇逢聞而義

之爲作三聯合傳云

光字伯明邑諸生事繼母孝教諸弟嚴家世業農父應科好施與七世同居子姓百餘口置園几二外則男子以次共食內則婦女以次共食額其堂曰效藝嘗赴省試拾遺金數百於旅舍俟其人歸之嘗言行事當以聖賢爲法始無悔事立心當求鬼神可鑒始無愧心其刻志勵行如此子於彝有學行光卒未葬值流賊屠太康居民逃竄於彝獨抱父柩號泣不去賊大至怵之曰汝獨不畏死邪推墮城下傷腰臂幾死越三日賊退踉蹌歸家以土掩柩而後去時歲大祲人相食邑令餽穀四十斛悉推其餘以賑貧人年八十二無疾而終耿氏以孝友名世子姓守其家法中州稱禮讓者以耿氏稱

首

耿輔者虞城諸生早喪父奉母避亂開封會流寇決河灌城  
輔倚浮木負母渡水逃獲免後居母喪哀毀骨立編衣蔬食  
終其身

劉德瀆涿州人父源汴官鴻臚寺鳴贊甲申闖賊陷京師按  
京朝官及選人籍名索諸薦紳擄掠之號曰追賊或立獎或  
賂而免或受其賂而又殺之方是時源汴名亦在索中德瀆  
匿源汴他所而身自詣賊曰劉鳴贊卽我是也賊拷責默無  
一言久之度父已遠去乃奮起批叱罵賊賊杖殺之而源汴  
竟行遁沒齒不出

劉思廣襄城人崇禎末年流寇亂父漢臣被執思廣方十歲

號哭奔赴父已被害慟哭收父屍賊怒截其耳鼻不肯去賊  
憐而釋之負父屍以歸兄弟同居終身無閒言有姊少寡迎  
歸撫其二子給以田產母歿哀毀嘔血遂卒寢門外產芝三  
本人咸謂純孝所感云

周繼聖字述之長沙諸生獻賊陷長沙其鄉人某故與繼聖  
有隙嗾賊授以偽職匿不出則繫其母妻詣賊仍不屈則次  
第殺之闔門殲焉繼聖力衛母賊斷其右腕尋逸去密謀聚  
眾殲賊並某家三百餘人以其首祭母督師何騰蛟上其事  
授教諭繼聖痛家難終身不仕

張維德合肥人崇禎乙亥流寇入境執其父將殺之維德年  
甫十五歲延頸就刃求代父賊義而釋之越二十一年父卒

哀毀骨立廬墓側三年又張振祚廬江人也父宏任攜孥知四川嘉定州崇禎壬午流賊逼城振祚奉父命領數騎突出求援城尋陷振祚還見父被害觸石死

黃向堅字端木吳縣人父孔昭官雲南大姚知縣國變後阻兵不得歸向堅子身往尋之以家事付其妻曰此行不見父母不歸也族黨皆阻之不聽既出門遇客之舊往滇者詢之告以道里遠阻獐獍險惡復阻之卒奮然往一蓋一笠越關數百重將及滇時兵戈未靖滇人訝其形容衣服不類疑爲間諜告以實痛哭如嬰兒眾乃釋之至白鹽井遇父母及從弟向嚴俱無恙喜極哭失聲蠻獠皆爲感動踰一年得歸歸時途中與弟親扶籃輦怡怡如也始辛卯十二月訖癸巳六

月往返二萬六千餘里吳人作樂府以傳其事

顧廷琦字珮堅長洲諸生父繩詒知四川仁壽縣獻賊破成都  
都不屈死亂既定廷琦黥面赤踝前後厯四寒暑始得扶柩  
歸中間川水暴漲幾死絕粒數日幾死遇盜劫幾死臨穹崖  
絕巘墜深淵幾死而卒不死方之成都時無有知父瘞埋處  
者呼號路側誓不欲生由遵義民輾轉訪詢始得諸龍腦橋  
側廬墓數月往返六萬四千餘里抵里門鬚髮白矣因自撰  
人蜀記

劉龍光字蓼蕭長洲諸生父廷謬官益王府長史國變道梗  
龍光始以省試歸兵後不知父母存歿日夕涕泣家故貧徒  
步往建昌時益府舊人無在者禱於張令公之神夢中若有

告以石深者然不知所謂久之遇一尼云石深爲閩粵交界處今官道阻兵出間道往七日可達龍光乃冒死穿藤峽一綫天踰白石嶺高萬仞蟻旋而上血漬雙足過山麓得微徑俯視山下有村村中板屋三楹流泉泱泱鳴石上龍光心動謂得所卽石深乎叩其戶則母管氏出焉喜極而哭問父所在先二年卒殯板屋中又大哭村民聞之皆來觀曰吾鄉舊名見娘村宋孝子王龍山見母處也今遇子又一孝子矣乃奉母扶櫬歸孝養十餘年母歿以哭母得心疾終其身

錢美恭紹興人父士驢由舉人官雲南陽宗縣有子三美恭其季也八歲時庶母與仲兄之官美恭及伯兄侍母留故鄉未幾國變滇南道梗伯兄亦卒美恭欲往尋親母曰空囊能

行萬里乎美恭曰絕處逢生未可知也遂於癸卯秋由江廣抵廣南病瘧力疾行山徑十步九頓至蒙自宿土城旅店竟夕不寐悲吟聲達戶外有楊姓者問之告以故楊曰是故錢守兒邪守以考最擢知嵩明州乙未五月卒官葬通海縣之南山在滇復舉兩子今不知散失何所矣美恭遂至通海問南山無知者哭於路左有老人曰君家舊僕童姓尙存盍詢之至則不復識詳告之乃相持哭尋謁慕南山仲兄至亦不相識矣探庶母幼弟俱在謀歸父骨無貲寄跡僧寮展轉可貸始偕仲兄負骨歸蓋往返六年矣好事者演傳奇曰尋親記

趙萬全會稽人父應麟儒而貧出游四方值國變阻兵不得



歸轉徙他鄉以歿萬全幼數從母問父所在及長遂辭母獨  
行求父度淮歷燕齊楚豫秦隴日不再食謳號於塗初萬全  
將出懼不審父狀張牘書應麟名及鄉里年歲容貌揭於背  
以行久之抵馬邑有張文義者聞之亟走視誦所書牘曰吾  
幸識而翁翁客遊無所寄食嘗爲我授書吾哀其死也櫛而  
封之萬全聞言號而仆絕復蘇者數乃負骨歸以教授供其  
母母亡得合葬廬冢上三年

王原文安人父珣崇禎時苦歲荒役重不能支辭其妻曰我  
去則追呼不及門嫠婦孤兒庶可安也遂逃去原稍長從羣  
兒學有嘲其無父者歸問母得其故大悲旣娶婦乃辭母求  
父去足跡半天下乞食充腹跣步重趼至見骨一日渡海至

田橫島假寐神祠夢至一寺已至輝縣之帶山有寺曰夢覺  
原心動曰吾夢豈至是微邪詢之父果在已爲僧乃抱持慟  
哭相將還里夫妻子母復聚焉

沈萬育字和卿常熟人南都亡負母避亂於野遇盜奪其構  
母因不與盜怒將殺之萬育泣而求代並得免鄰人失火延  
母寢母疾方劇不可以遷萬育號痛呼天天反風火以熄母  
年八十餘疾危篤割股以進弗瘳夢緋衣神告曰疾非五藥  
所能治也醫凌某在雙林速致之凌至以針達之霍然愈萬  
育性好義建橋梁施棺槨隱居以終

盧必陞字案臣山陰人生有異稟年九歲父芳患病思得魃  
魃炙必陞潛攜筐採諸沙口爲潮所沒得漁者救以竹筏筐

終不釋手而蟛蜞滿其中仲父茂無子以必陞爲嗣南都既  
亡茂負俠氣嘗仗劍獨行不知所往必陞奔覓諸暨山中晝  
循林箐夜則崎嶇山谷伏屍枕籍驚跣疾奔兩足爲沙石所  
嚼血縷縷漬地行跡皆赤遇一僧憐之挾與俱遇虎匿高樹  
大呼山神救我虎竟去閱數月得奉父以歸旣而土寇竊發  
茂陷賊營必陞往贖以金不應繞岸哭三日夜不絕聲賊感  
動爲引至父前賊欲其父降脅以刃必陞冒刃叩頭流血忽  
狂風疾雨舟幾覆賊震駭乃得釋茂旣被創病日臻必陞日  
夜侍側以兩手摹患處茂嘆曰人摹我痛痛在我身汝摹我  
痛痛在汝身先是茂妻徐氏有女忌必陞爲嗣分其貲鬻遣  
盜要於路擊之垂死遇救得免必陞處之泰然徐氏卒感悟

年七十四而終

嚴書開字三求歸安人父爾珪官廣東參政書開幼警敏八歲能屬文舉崇禎癸酉鄉試簡討汪偉其座師也北都陷以抗節死書開聞之慟哭將往經紀其家會丁母憂居喪愈哀毀服除乃走抵昌平謁思陵刲牲列祭哭盡哀守陵校尉王鴻羽嘆曰咫尺京都明之貴人達官無一停驂者子何人斯而哀若是旣歸杜門不復出與里中遺老爲問道社研濂洛之旨旁及兵刑錢穀屯田水利諸經濟學可裨世用者其同年生溧陽陳名夏合肥龔鼎孳皆入仕我

朝方貴顯遺書勸之出書開堅拒之性孝友父嘗臥病百藥弗效沈思曰其殆中粵蠱乎卽裹糲踰五嶺求靈草傍徨山

澤無所得號泣於道恍惚似人有告以九華山者返至九華  
遇異人授以方父疾果愈撫庶弟如子歲凶出家財三千金  
爲縣輸逋賦倣范莊義田贍族人之貧者戊亥間海上師起  
邑中大姓爲羣不逞所持輒誣以通海甚者誅夷竄塞外書  
開家故箠坐是大困邑令強之就試宗人或怖之曰子不出  
禍且及宗乃赴甲辰禮部試未畢事卽移疾歸學士葉方藹  
得其五策奇之曰此真通知古今老宿也時甫變取士制廢  
經義用策論主司欲以冠多士及次場文不至嘆息累日書  
開晚愈豁然結廬臯亭山人衲子相攜徘徊澗壑往往經  
歲不歸自號逸山卒年六十有逸山文集十二卷

孫博雅字君僑容城處士奇逢子也幼端重不苟嬉笑甲申

後棄舉子業絕意仕進奇逢遷蘇門博雅獨留貧無以炊餘柿餅以供母徒步奉至蘇門母病不交睫不解衣帶者三旬餘及卒爲孺子泣三年不見齒奇逢年漸高偕兄弟朝夕上食夜則更臥牀前候其欠伸未嘗頃刻離時從奇逢游者日眾有數百里或數千里至者博雅設榻供食各得其宜

國朝康熙八年

詔舉山林隱逸郡守程啓朱以博雅名上之大府以父老力辭無何父卒偕兄篁雅弟韻雅廬墓三年哀毀骨立博雅德器純粹與人交和易可親見人一善贊揚不去口人有過不顯言閒引一二古語相感發聽者聳然多見省改韻雅坐事被逮繫刑部獄凡五年將遠徙博雅具橐餽以從病致藥餌

更周卹其同繫者家故貧竭產供弟故交所贈遺皆拒不受  
同難有械繫者博雅以塞監讓之徒步烈日兩足皆腫嘗遇  
暴風雨失道幾溺死飢渴困頓遂病每假寐口中喃喃皆其  
弟事也頃之竟不起彌留猶張曰曰吾弟免矣遂卒年五十  
五不數日弟事漸解竟免流徙士大夫高其義私謚文孝先  
生所著曰約齋集

李明性直隸蠡縣諸生性篤孝其父春秋高日必五六食明  
性率其婦馬雞鳴起盥漱問安每食必手捧持之自奉糠粃  
不繼嘗侍疾數月衣不解帶居喪屏酒肉不入中門晨興必  
上冢號泣六年如一日時容城孫奇逢講學蘇門祁州刁包  
聚生徒里閭明性獨篤行卻講期爲有用之學隱居以終學

者私謚孝愍先生

楊嘉禎江西宜春諸生有學行丙戌春父文盛避兵山塘兵將至嘉禎從間道渡水報父水湍急被溺流至深處減頂矣猶躍出水面曰速走速走遂溺死

會稽梁繼元參校

小腆紀傳補遺卷第

終



小腆紀傳補遺考異卷第

男承禮謹譔

韓王某傳

韓王某者韓憲王之後太祖支孫也

明史世表列傳載韓王竄圻於崇禎十六年爲李自成所執後無攷

趙王由棧傳

乙酉夏與總兵黃蜚起兵太湖

本明末忠烈紀實而諸書謂蜚與監軍道荆本澈等奉義陽王朝墀起兵駐崇明沙茲云由棧豈蜚先奉朝墀後奉由棧抑本澈所奉爲朝墀而蜚固由棧諸書不及

詳歟

庚寅二月惠潮道李士璉與總兵郝尙久投誠

大清導

王師入關執由棧及邵王十三人以獻

所知錄只云執郡王十三人不言由棧五藩實錄則云潮州山寨私擁趙王及李成棟遣兵至潮自歸薙髮居孝光寺會陳子壯起兵事洩王實不知也廣州知府陸元璣降受成棟指逼至元妙觀勒令投繯云云似由棧之死在丁亥間也姑附志以俟攷焉

淮王常清傳

又上饒王常沅以宏光元年二月襲封

世表載上饒王翊鉅於萬厯中襲封常沅蓋其子也

永甯王由樞傳

永甯王由樞字冠寰敬王第十子

紀年本南疆繹史作永甯王慈炎誤也今據逸史及世表正又逸史作第八子世表作第十子今從世表

及安義王某

按世表載安義王常淙於萬厯三十一年封薨不言嗣王何人

長子慈炎亦遇害

逸史永甯王傳慈炎作慈營謂由樞與長子慈營被執丙戌正月七日檻車赴燕三月朔至蘆溝橋遇害與紀

略諸書不合附志俟攷

令待命於其弟彭指揮家

諸書亦作永甯王妃之弟李指揮家

羅川王某

世表載羅川王由桵以萬厯三十一年襲封此其由桵歟

又有瀘溪王某及楚藩武岡王徽藩延津王

世表瀘溪王常淵萬厯二十九年封薨武岡王華增以萬厯二十八年襲封延津王常淦以萬厯中襲封均不言嗣王何人

鄧王器壘傳

南疆釋史作鼎器乃活字版訛誤今據逸史改正

桂王由櫻傳

十六年獻賊犯湖南端王與由櫻走全州得達廣西永明王被繫

以上參所知錄永歷實錄而五藩實錄則云與永明王同被繫詳見紀傳考異卷第

時宮眷僚屬尙有千餘資用恆苦不足

五藩實錄載安仁素殘刻凡永明衣食所需仰給於兄恆缺一日安仁遣內使周明押衣篋四送永明舟中王大喜啓視皆赭黃袍別無可常御者王爲不懌周明前啓曰願王靜俟天命自有服御之日云云恐係傳聞之

誣附志於此

乙西南都亡廣東在籍尙書陳子壯等議奉由櫻監國

明史南疆逸史繹史勘本均謂端王時事大謬蓋諸書不知由櫻有諡故以議立事屬諸端王而又以端王之諡爲恭也王夫之永歷實錄及南沙三餘氏五藩實錄所敘甚明今從之

益陽王某傳

益陽王某蓋遼藩裔也

世表有兩益陽王一爲周王宗支於嘉靖中國除一爲遼王宗支有莊懿王憲燭於萬曆十年薨後嗣無攷此殆其裔屬歟

瑞昌王議漑傳

瑞昌王議漑甯藩裔太祖十世孫

紀年本南疆釋史勘本作盛漑逸史明末忠烈紀實均云議漑按世表瑞昌王爲甯惠王支庶於正德十五年坐宸濠反國除議漑蓋其後裔故隆武以之襲封今從之

奔傳

奔字雪個

本張庚畫徵錄作朱奔蓋當時懼禍易名故與世系字不合也

盛徵傳

盛澂字青湖楚藩通城王裔

世表無通城王蓋通山王之譌志之俟攷

稱通城王

野史諸書有誤以盛澂爲嗣通城王者今以忠烈紀實  
行朝錄所知錄南疆邇史攷之則知盛澂爲宗室無疑  
蓋當日義兵擁立爲號非以祖宗之爵不足以資號召  
紀事者無從別白遂就傳聞者之篇耳疑諸書所載諸  
王類如此實不皆襲封也

盛濃傳

曾聞汀州變乃走廣東

明末忠烈紀實云盛濃丙戌八月死於衢州誤也



小腆紀傳補遺考異卷第 終

會稽梁繼元參校

六合徐彝舟宮詹孫麒星使喬梓先後纂成小腆紀年紀  
傳直與談遷彪固鼎足而三參之韓柳歐蘇用心則一忠  
孝堅如鐵鑄文字擲作金聲木君茂才宮詹之孫星使之  
子篤實光輝有志士也少時隨宦海外通日英方言當軸  
兩以日比使館參贊薦病不果往由此有倦游意余令六  
造廬相見懽若平生欣讀是書惜其流傳絕少商請覆印  
木君諾之督促鳩工三越月而卒事會余瓜代及期幸觀  
是書之成挈百卷而歸江湖俗吏之壓裝生色書此錄別  
並白諸父老東坡去矣終不能忘情於黃州也京江鶯巢  
包安保記時甲戌暮春之月

右小腆紀年紀傳二種先大父作之先父述之相繼而成

之者也先後鈐印者再因亂散失絕少完本吾邑縣令包  
柚甫先生儒吏也治公之暇時相過從談涉是書覆印相  
約分鶴俸而爲之倡爰鳩工以促其成時逾三月裝成千  
部讀楹書而感媿先人之手澤常新話棋局而傷心來日  
之隱憂未艾用述覆印緣起以詔後人

孫男椿謹跋